

原輯南嶽志廿六卷

第十冊

南嶽志卷十五

平江李元度原輯衡山

王香余  
歐陽謙

校刊

釋一

寶掌

指月錄寶掌和尚中印度人也生周威烈王十二年丁卯初生左手握拳七歲祝髮乃展因名寶掌魏晉閒東遊中土入蜀禮普賢常不食日誦般若等經千餘卷一日謂眾曰吾有願住世千歲今年六百二十有八人遂以千歲稱之嗣遊五台徙居祝融之華巖後居浦江之寶巖唐顯慶二年示寂蓋已一千七十二歲矣示寂時說偈云本來無生死今亦示生死我得去住心他生復來此



希遁

總勝集希遁梁天監中度天台遇惠海尊者云爾戒行無虧當於南嶽方廣寺一會及遁至南嶽詢無方廣名忽於七十二峯閒覩精舍號方廣俄見海師曰汝來何遲耶此五百尊者道場也未當居此當居西北峯頂如言結庵其處大通六年卽其庵建方廣寺

惠海

一統志惠海方廣寺開山祖師也著大雲和尚法要一卷每誦經有五白衣長者列坐同聽問其姓名乃本山龍神也自言願獻寺基師諾之一夕大風雷擁沙成平地遂建刹焉

海印

總勝集海印居衡山善果道場宣坐禪定一志如初積數年誠動  
天地薪水自至虎蛇遠奔陳光武初年慧思和尚自北來忻然合  
契由是上石橋別剏庵舍號南臺寺遠近傾慕

慧思

一作惠思

佛祖統紀三祖南嶽尊者慧思姓李氏元魏南豫州武津人也兒  
時夢梵僧勸令入道又夢普賢垂白象上摩頂而去昔未識文今  
自然解所摩頂上隱起肉髻年十五出家謝絕人事專誦法華日  
唯一食又嘗夢阿彌陀彌勒佛與之說法又隨彌勒同諸勝友俱  
會龍華倍加精進東魏武定六年在河南光州與眾議論爲惡比  
邛所毒垂死復活齊天保四年在郢州爲刺史劉懷寶講摩訶衍

義諸惡以生金藥置毒食中師命垂盡一心念般若波羅密毒即

消散乃顧徒屬曰齊祚將傾佛法暫晦當往何方以避此難忽聞

空聲曰若欲修定當往武當南嶽師以陳光大二年入居南嶽謂

其徒曰吾寄此山正當十載過此以後必事遠遊先是有梁朝高

僧海禪師居之一見如舊識即以定山俾師行道師一日登祝融

峯與嶽神會棋神揖師曰師何來此師曰求檀越一坐具地神曰

諾師即飛錫以定其處今福嚴寺是神曰師已占福地弟子當何所居

師即轉一石鼓下逢平地而止今岳君塑像坐石鼓上嶽神乞戒師乃爲說

法要一日師謂嶽神曰他日吾有難檀越亦當有難師指巖下曰

吾一生曾此坐禪爲賊斷首尋獲枯骨一聚今福嚴一生巖至西南隅指



大石曰吾二生曾居此卽拾骷髏起塔以報宿修之恩

今二生塔

又至

蒙密處曰此古寺也吾三生嘗託居此地因指人刷之果有僧用

器皿及堂宇之基卽築臺爲眾說般若經

今三  
生藏

眾患無水師以杖

卓崖虎因跑地泉乃涌出大建元年九仙觀道士歐陽正則覩山  
有勝氣謀於眾曰此氣主褐衣法王彼盛則吾法衰矣乃鑿斷岳  
心釘石爲巫蠱事埋兵器於山上因詭奏曰北僧受齊募而爲之  
宣帝遣使考驗初度石橋有兩虎號吼使者驚退師飛錫而往金  
陵四門皆見師入帝坐便殿見師乘空而下梵相異常驚悟其神  
一無所問以道士誣告罔上令案治之罪當棄市師請曰害人之  
命非貧道意乞放還山給侍僧眾亦足小懲帝可之師還山將行

餞以殊禮稱爲大禪師思之大名蓋得於此師既還山說法如故  
時道士私誓曰今世神通官勢皆所不如後五百年當生汝法中  
壞滅汝教師亦預記曰此諸道士害我無因異日著我袈裟入我  
伽藍壞遺體矣

宋大觀閒道士林靈素熒惑天聽果移文物色前  
事以歲遠無考而止乾道初有僧傑字止菴來主

此山謀遷合二生塔於三生藏蓋傑擬私其地爲已塔也遂開石  
龕見靈骨如黃金色有石屏刻歐陽正則及傑等名不少差異眾  
大驚駭是夕岳廟一熱而盡州縣聞之逮  
捕甚急傑等皆逃寺眾復掩藏其骨焉

師將順世端坐唱佛來

迎合掌而逝顏色如生異香滿室時大建九年六月二十二日壽  
六十三師身相挺特耳有重輪牛行象步不倚不斜平昔禦寒惟  
一艾衲繒纈之屬一切不受所居之處靈瑞重沓供物嚴備瓶水  
自滿有諸天童以爲侍衛異香奇迹不可勝紀嘗示眾曰道源不

遠性海非遙但向已求莫從他覓覓卽不得得亦非真所著述多  
口授門人筆成章句有無淨行門大乘止觀各二卷次第禪要三  
智觀門各一卷傳鐙錄誌公嘗遣人謂師曰何不下山教化眾生  
師報曰三世諸佛被我一口吞盡有何眾生可化

案師生於梁天監十四年至陳光大二年始至南嶽時年五十  
四誌公已入滅於梁武之世久矣不當有此遣問恐別有一師  
後人誤傳爲誌公耳

國朝雍正十三年

加封圓慧妙勝禪師遣有司致祭

宋黃庭堅禮思大禪師塔題名修水黃庭堅弟仲堪子枌梓椿



相稅成都范溫道人文演同來禮思大師閱三生藏閱貝多梵  
字經二錫杖象刻佛供僧俗書經夾有纖靡如蟻映光不可讀  
者及佛牙舍利蚌中觀音相寶玩流目爲書觀寶軒三大字坐  
獨松軒觀老松突兀於眾杉閒本無超羣之意崇甯三年正月  
甲辰

明廖道南懷思大師詩懸崖飛閣臨千仞落日停輦宿上方萬  
壑松風鳴梵宇一龕鐙火對禪床懶殘蹤迴雲門外無礙功成  
石室旁若使少陵重寓此幽期不減贊公房

### 慧命

天台山志慧命天台人參思大禪師於南嶽聞說三觀深悟元旨

得無礙辯說法如瀉將示寂眾見佛與大士來迎卽向西升空而去

### 智顗

智顗字德安華容陳氏子自有重瞳俊朗通悟初謁思大師於大蘇山思一見語之曰昔靈鷲同聽法華經今再來矣卽示以普賢道場說四安樂行曰非爾莫證非予莫識此乃法華三昧前方便初旋陀羅尼也師旣承印可隨侍南嶽二載陳大建元年往金陵瓦官寺創宏禪法尋感異夢住天台峯號天台智者說法三十餘年常披一壞衲煬帝尊信之執弟子禮甚恭撰法華經義止觀等部凡百餘卷門人灌頂日記萬言而編緝之總目爲天台教別隋

開皇十七年十一月二十二日語眾曰吾將去矣言已端坐而逝  
年六十有七師在南嶽既解法華六根清淨義沈吟久之有西域  
僧謂曰惟首楞嚴經著明六根功德足與相證師於是渴慕昕夕  
望西遙拜如是者積十六年今南嶽天台寺左畔有拜經臺其遺  
蹟也師入滅後楞嚴始至中土猶師之精誠所感云

### 淨業

淨業漢東隨人也精研律部博綜異聞隋仁壽三年被舉送舍利  
於衡州之衡嶽寺立塔四時峯上白雲闊二丈直至塔所三帀而  
去初入潭州卽有神鳥千數迎之大業十二年二月十八日示寂

### 瑗上人



王維詩小引 瑗上人居衡嶽學道於五峯蔭松栖雲與虎狼雜處  
天寶中攜瓶笠遊長安杖錫南還王維同崔興宗作詩送之

懷讓

傳鐙錄懷讓姓杜氏金州人卽七祖也生於儀鳳二年四月八日  
感白氣應於京象在安康之分太史奏聞高宗問是何祥瑞太史  
曰國之法器不染世榮帝敕金州太守韓階親往存慰其家家有  
三子惟師最小炳然殊異年十歲惟樂佛書垂拱三年方十五歲  
辭親往荊州玉泉寺依宏景律師出家通天二年受戒後習毘尼  
藏尋謁嵩山永和尚安啟發之指詣曹溪禮六祖侍左右十五年  
先天二年始住衡嶽般若寺開元中有沙門道一在嶽山常習坐

禪師知是法器往問曰大德坐禪圖甚麼道一曰圖作佛乃取一  
磚於彼庵前石上磨道一曰磨作甚麼師曰麼作鏡道一曰磨磚  
豈得成鏡耶師曰磨磚旣不得成鏡坐禪豈得成佛道一曰如何  
卽是師曰如牛駕車車若不行打車卽是打牛卽是道一無對師  
又曰汝學坐禪爲學坐佛若學坐禪禪非坐臥若學坐佛佛非定  
相於無住法不應取舍海若坐佛卽是殺佛若執坐相非達其理  
道一解悟心意超然其後闡化於江西卽馬祖也天寶三年八月  
十七日師示寂於衡嶽諡曰大慧禪師塔曰最勝輪吏部侍郎歸  
登爲撰記眾以師爲觀音菩薩應身故又號觀音大師

唐張正甫觀音大師碑銘師自曹溪受法乃陟武當窮棲十霜

揭來衡嶽終焉是託惟般若勝槩有觀音道場宴居斯宇因以爲號據此則讓稱觀音大師又以道場得名

道一

傳燈錄馬祖道一禪師漢州什邡人容貌奇異牛行虎視引舌過鼻足下有二輪文開元中習禪於南嶽傳法院遇讓和尚密授心印旋住江西闡化四方學者雲集貞元四年正月登建昌石門山謂侍者曰當以來日委質於此以二月朔日跏趺入滅世壽八十僧臘六十元和中賜諡大寂禪師

國朝雍正十三年

加封普照大寂禪師



玄光

神僧傳玄光海東熊州人也少穎悟往衡山見思大和尚多所參悟後返錫江南屬本國舟艦附載離岸時忽彩雲溢目雅樂沸空絳節霓旌傳呼空際有聲云天帝召海東玄光禪師光拱手避讓有青衣前導少頃入宮城宮府羽衛無非鱗介參雜鬼神一人曰今日天帝降龍王宮請師說親證法門吾曹水府亦蒙利益旣登寶殿次陟高臺如問而談略經七日然後王躬送別其船泛洋不進光復登船始乘之歸熊州

行思

行思禪師姓劉安成人幼住嶽每羣居論道師惟嘿然往參曹溪

法席六祖深器爲諸弟子冠

懶殘

甘澤謠懶殘名明瓚一稱懶瓚大照之門人也天寶初居衡嶽寺爲執役僧晝專一寺之工夜止羣牛之下二十年無倦色每日俟眾食畢卽收所餘食之以其性懶而食殘故號懶殘羣僧嘗令看鹽雨至流於池羣僧毆之不怒冬月臥竈前不起眾以粥洒其頭因就頭取而食之李泌讀書寺中聽其梵唄響徹山林李頗知音能辨休戚謂懶殘經音先悽惋而後喜悅必謫墮之人時將去矣候中夜李公潛往謁焉望席門通名而拜懶殘大詬仰空而唾曰是將賊我李愈敬謹惟拜而已懶殘正撥牛糞火出芋啖之良久

命之席地取所啗芋之半以授焉謂李曰慎勿多言領取十年宰相李拜而退居一月刺史將祭嶽修道甚嚴忽中夜風雷一峯頽而下緣山磴道爲大石所攔以十牛挽之數百人鼓譟推之不能動嬾殘曰我能去之眾大笑以爲狂嬾殘曰何必見嗤試可乃已遂履石而動忽轉圜而下聲若震雷山石旣開寺僧皆羅拜刺史奉之若神嬾殘峭然乃懷去意忽寺外虎豹成羣曰有殺傷嬾殘曰授我箠爲爾盡驅除之眾與之荆挺皆躡足以觀纔出門見一虎銜之而去蓋皆其所幻也自後虎豹亦絕蹤而李公果十年爲相林閒錄高僧嬾瓚居衡山石窟中嘗作歌曰世事悠悠不如山邱青松蔽日碧澗長流山雲當幕夜月爲鈎臥藤蘿下塊石枕頭